

## **“Mana sira, imi tenke kalma”**

*Opiniaun iha Timor Post, 31 Maiu 2021*

Ba dala tolu audiénsia julgamentu adia iha kazu abuzu seksuál hasoru labarik ne'ebé ministériu públiku akuza eis-padre.

Ami rona beibeik, “Mana sira, imi tenke kalma”. Ami hatene katak “konsellu” ida-ne'e atu ami hakalma a'an mai hosi estereotipu katak feto sira bainhira hamriik ho asertivu hanesan feto ne'ebé nervozu ona.

Ami husu, oinsá mak ami bele “kalma” bainhira ami rasik haree terus loroloron hosi vítima iha sira nia matan? Oinsá mak ami bele “kalma”, bainhira mós hetan “konsellu” "karik di'ak liu para tanba agora ita hotu labele halo buat ida, kazu ne'e politizadu ona”.

Ami la hatene Timor-Leste atu ba ne'ebé ona bainhira violasaun seksuál bá labarik sai “polítika”. Instrumentaliza terus labarik feto ne'ebé hetan abuzu seksuál durante tinan ba tinan, hanesan buat ida ami nunca espera hosi kualkér ema Timor ida, liuliu haree ba ita-nia istória rasik.

Imajina katak kazu violasaun seksuál alega hosi labarik-feto 15, iha akuzasaun formál hosi Ministériu Públiku, kontra ema ida ne'ebé hetan ona kastigu dixiplinár hosi Amu Papa rasik sei sai to'o agora alvu ba liafuan katak buat sira ne'e hotu nu'udar “konspirasaun” hasoru arguidu hosi “máfia justisa”.

Besik tinan 3 ona, versaun oinoin konspirasaun hosi kazu ne'e inklui: Kongregasaun SVD hakarak na'ok rai iha foho leten Kutete; Sr. Mari Alkatiri hakarak hari'i Mashid iha Kutete; Sra. Bárbara Oliveira hakarak na'ok rai Orfanatu iha Mahata atu halo restaurante ida; Sra. Ana Paula Sequeira no Dra. Hildegardis Wondeng hakarak na'ok rai iha Mahata atu fila ba discoteque, eis-membru Topu Honis no eis-doadór hakarak hadau orfanatu.

Faktu: Igreja iha Timor-Leste iha rai barak ona

Faktu: rai iha Kutete mak rai komunitáriu no la pertense ba arguidu

Faktu: ema musulmanu barak la iha iha Kutete ne'ebé sei presiza ba Mashid ida

Faktu: Bárbara, Ana Paula no Hildegardis ema profesionál serbisu iha empreza sosiál iha área justisa no balun la hatene nein tein no nein iha istória halo disquoteque

Faktu: bazeia ba sensu komún, ema estranjeiru ida no ema Oecusse business na'in ida sei lakoi “hadau” orfanatu atu simu todan atu tau-matan ba labarik vulnerável barak

Aleinde buat sira-ne'e hotu, ami hosi JU,S mós hetan alegasaun beibeik iha públiku katak ami koko influénsia labarik sira atu sira inventa katak sira hetan abuzu seksuál. Bainhira mak iha Timor-Leste labarik 15 sei bosok kona-ba buat ruma ne'ebé, ho tabú no estereotipu oinoin hasoru vítima abuzu seksuál, sei (nafatin) bele hamoe sira no sira-nia família?

Tanba-sá mak labele loke matan de'it ba faktu simples balun: labarik-feto 15, ho idade entre tinan 12 to'o 26, hateten katak sira hetan abuzu seksuál hosi Diretór orfanatu. Abuzu ne'e, tuir idade no tempu sira hela iha Orfanatu, akontese hosi tinan 2006 to'o 2018. JU,S ho sira-

nia profisionál halo apoiu jurídiku no psikusosiál ba vítima sira, buat ne'ebé bainbain akontese loroloron iha sistema justisa iha Timor-Leste.

Tanba-sá ema sei dúvida ezisténsia alegasaun hosi labarik-feto bainhira konsumu públiku ona katak arguidu konfesa dala barak ona, iha polísia, iha igreja nia oin no ba sira doador orfanatu?

Ami husu lé na'in: istória ida-ne'ebé mak parese besik liu realidade iha Timor-Leste? (1) Iha konspirasaun entre ema polítiku sira, hadau rai hosi doador no defensor ba labarik sira, no bosok hosi labarik feto sira katak sira hetan abuzu; KA (2) krime seksuál hasoru labarik feto karik akontese duni?

Loroloron polísia no prokurador simu kesar violénsia seksuál. Ho beibeik tribunál julga kazu abuzu seksuál hasoru labarik-feto no feto sira. Ne'e realidade, ne'ebé ema ida labele nega.

JU,S lakoi funu malu no soke malu ho ema-boot, nein ema ki'ik no mós ho instituisaun sira; ami bele sibuk halo buat seluk. JU,S hakarak de'it justisa ne'ebé justu, no aplikasaun lei ho igualdade, la haree ba pozisaun ka status hosi arguidu. JU,S fiar metin ba mehi ida-ne'e, mehi ida-ne'ebé mós sai hanesan abut ba funu hasoru esplorasau no kolonizasaun iha rai doben Timor-Leste.

Se sistema justisa bele julga ho sériu ema boot ba kazu korupsaun hosi kór oinoin, tanba-sá mak sistema justisa labele julga mane ida estranjeiru ne'ebé uza ninia pozisaun atu esplora labarik-feto sira ne'ebé vulnerável liu hosi ita-nia sosiedade?

Kazu ne'e, sai hanesan alvu no instrumentu ho intensaun atu intimida ami nu'udar organizasaun ne'ebé lidera hosi feto no representa feto-maluk sira, nune'e mós atu hamate lia-loos hosi vítima sira.

Kazu abuzu seksuál hasoru labarik iha Topu Honis la'ós konspirasaun hadau rai, la'ós polítika ida, la'ós serbisu la étiku hosi profisionál direitu sira.

Kazu ne'e tuir loloos simples: kazu violénsia seksuál hasoru labarik sira, kazu ho natureza hanesan ita haree, ho laran susar, dala barak ona iha Timor-Leste.

Ami hosi JU,S husu entidade pública sira hotu, mane no feto sira atu tau ókulu realidade nian, no haree kazu ne'e tuir ninia natureza.

Ami la iha ona liafuan atu esplika ba alin-feto sira na'in 15 katak julgamentu ne'ebé dalan atu lori ba justisa sira-nia abuzador atu adia dala ida tan.

Sira-nia mata-ween, no mata-wen hosi labarik vítima sira hotu iha futuro, sei kontinua sulin nafatin se ita hotu la hamriik hamutuk hodi haree realidade tuir faktu sira hatudu ho klaru.

Dili no Oecusse, 25 Maiu 2021

Maria Agnes Bere  
Bárbara Nazareth Oliveira  
Maria Rosa Xavier